

同治戊辰重刊

# 產孕集

三松堂藏板



# 序

產孕集者張子輯醫經方書之言產孕者爲書蓋產寶諸方之流以豫民用者也張子少工醫名藉甚世多傳其書而余反復讀之竊有以見其用意之至非醫家者流所能及其言產孕非醫之事難產多自致之因推產孕生化之由生人美惡之故而歸其原於胎教旨深哉而難者或謂文母胎教目不視惡色耳不聽淫聲口不道惡言此聖賢克己復禮之事非可望之婦人女子然余嘗考之禮徵之詩竊見周官內史之所掌曲禮內則之所陳關雎葛覃采蘋之所詠酒食糾組以勞其體珩璜容臭以飭其度進退有其儀起居有其節凡所以範其心志養其性情閑其物欲者委曲煩瑣必周必詳

豈有惡色之可視淫聲之可聽惡言之可道哉物欲絕而性情和性情和而心志一清明在躬疾疢不作烏有所謂難產者哉詩人之美姜嫄曰先生如達不圻不副無災無害列女傳稱文母曰洩於豕牢而得文王言生理之順皆以著母德之純由是以觀古未嘗別有所謂胎教者也禮而已矣後世禮教寢衰門內尤畧而不究至於燕私隱曲之地任情率意以爲固然於是性情日舛心志日佚喜怒失其度動止變其節和氣漸乖災害並至產孕之患特其一端識者慨女德之敝思古賢母之所以盡禮者推原其事因著胎教之說思以兒女之愛引其復禮之思而移其失禮之俗顧能爲胎教者必能明禮則之人然則今亦無所謂胎教也禮而已矣又嘗

讀詩而知則百斯男原於太姒之不嫉妬衷窈窕思賢才至  
於寤寐反側當時嬪御世婦類皆淑女故能相與以致其和  
而成螽斯之慶於是化行南國女子皆能以禮自守而和樂  
其室家芣苢江漢諸篇可謂極一時禮教之盛矣且夫周南  
召南皆宮壺之庸德耳宜非后夫人所欲自彰而當時化行  
列邦後世著爲風始周先王刑于之化反隱而不言而獨著  
后夫人之事豈不以禮始於夫婦而事達於國家禍福之所  
自生治亂之所由兆其事近而易忽其機疾而莫挽著一代  
之盛爲百世之鑒也乎然則謂先王之禮未可責之婦人女  
子者非知言也雖然使太姒之賢而非文王之聖則太姒以  
爲賢者文王未必以爲賢雖有逮下之恩保無凌上之咎化

何由成然則禮教之盛衰誠未可僅責諸婦人女子也耶余  
恐世有迂張子之言者因推其旨而以余所聞者證之若夫  
醫理之精方藥之美世多知者亦非余所知恐亦非張子命  
意之所注也道光乙巳三月同里章岳鎮



產孕集目錄序

辨孕第一 養孕第二 孕宜第三 孕忌第四 孕疾第五

辨產第六 產戒第七 用藥第八 應變第九 調

攝第十 懷嬰第十一 拯危第十二 去疾第十三

凡十三篇爲上下二卷敘曰產孕者天地之大化生人之本

始而難產之患自古有之左傳莊公寤生驚姜氏寤生卽逆

產也然古者持胎教寡嗜欲生理順而難產少故生民之詩

曰誕彌厥月先生如達不圻不副無災無害列女傳述文母

之胎教終之日洩於豕牢而得文王言生之易也後世不知

胎教務自縱恣生理旣逆難產實繁於是設方法以治之處

湯液以救之而方藥愈備難產益眾遂有婦媼羣起妄造謬

法剖胎出嬰使無知之赤子無罪之婦人櫻屠磔之刑罹鋒  
刃之慘生人之禍莫此爲甚夫人命至重也父子至愛也而  
戕賊生命刳剔人子旁觀不以爲非主者不以爲怨何哉醫  
無救之之術不能不望救於婦媼假令扁倉在左婦媼在右  
則雖至愚必知所擇故婦媼之殺人醫者之過也雖然產孕  
之事非醫事也難產之患皆自致之非本然也故欲湯之滄  
而揚之不如勿燖也欲絃之固而續之不如勿斷也欲難產  
之安而藥之不如勿致也不揣其本而齊其末不絕於彼而  
救於此良吏勿能爲治良醫勿能爲功然則欲治難產先理  
胎教欲理胎教先明禮則禮教隳廢內儀不修晏私暱於帟  
帷勤惰愆於厥職以苟適爲便以傲恣爲高蓋自縉紳浸於

編戶女德日敝難產日多競哀其末莫知其本君子之道造  
端乎夫婦記言其不信矣夫歲在己丑家君宰館陶余隨侍  
官解民有疾苦踵門求治輒爲除之而難產之患同於江左  
有婦逆生醫者莫救太孺人聞之命褻藥遣僕馳往治之至  
則死已竟日以貧故未收耄姑幼子號泣於室強飲之藥旋  
卽蘇活又巨室張氏婦孕五月動而漏下醫不知治十日而  
隕血注不止因而暈絕余聞藥之蘇又治百日乃瘳其他慘  
酷大都相類由此觀之無辜而死者蓋多已夫殺卵殀天先  
王所禁況在人類體仁利物儒者之事況在斯民用是考核  
原委該約大指著爲此書冀以絕其流弊豫其常變窮理之  
士或無誚焉道光庚寅冬十二月陽湖張曜孫

產孕集上篇

陽湖張曜孫著

吳縣潘希甫校

辨孕弟一

二氣相感合而生神兩精相搏聚而成形陽奇而施陰偶而承陽施而靜陰承而動靜則陽凝動則陰攝動靜互根形神交倚而孕以成易曰天地絪縕萬物化醇男女構精萬物化生故乾坤消息而變萬類日月運行而生寒暑鳥獸草木昆蟲鱗介之屬莫不附陰化陽因氣成質其生雖不同而所以生者一也人爲萬物之靈得天地之正具五德之全經緯蕃變與上下參男稟陽得乾道女稟陰得坤道乾主動而生靜



南京中醫藥大學圖書館版權所有

坤主靜而生動。乾動則陽施。坤靜則陰承。陽生靜則氣化而神。生陰生動則精融而形成神。裕其始而形要其終。故孕者始于神而終于形。生于陽而成於陰也。凡物生易而成難。未孕之先。兩氣相感如磁引鍼如芥黏珀。適然而合。其動以天。非陰陽離決。氣憊精涸者。鮮不凝合。自然生化。絕無人功。既孕之後。積氣成形。分別百體。營建藏府。條理絡脈。灌溉筋骨。閱三百餘日。乃成爲人。日滋月遂。盡取給于母氣。苟失其道。或生而不育。形體不具。氣血薄弱。壽命夭折。譬之果實之屬。風雪侵之。非立見萎落。卽不適于口。故未孕之先。無俟人力。既孕之後。半由人功。攝養以安之。藥物以助之。調其陰陽。以煦之。絕其賊害。以固之。祛其疾痛。以衛之。皆人力之所爲也。

古者婦人別立治法以有月事產孕之異而產孕尤重蓋產  
孕者生人之始而保護又產孕之始也患者不察或誤孕爲  
疾而肆其攻擊或誤疾爲孕而養虎貽患小則傷體大則傷  
生深可憫焉辨孕之法素問曰陰搏陽別謂之有子又以足  
少陰脈動甚者妊子也脈經曰脈滑疾而重按之散者胎已  
三月脈重按之不散但疾不滑者五月也文曰三部浮沉正  
等按之無絕者妊也千金方論曰脈平而虛者乳子法也手  
少陰脈動甚者妊子也尺中之脈按之不絕者法妊娠也諸  
家論脈其說不一要不外滑利和平不偏不弊所謂身有病  
而無病脈身無病而有病脈爲簡而易明經閉吐逆體怠惡  
食而脈反平和是有病而無病脈也外無吐逆諸病體旺如

昔而脈反滑利動疾是無病而有病脈也。脈象微妙驟不易知。差之毫釐謬以千里。善診者心領神會。毋事固執。斯爲善也。懷妊之候必病惡阻。苦沈重憤悶。不欲飲食。又不知患所在。頭重眩暈。四支惰懈。不欲執作。喜噉酸醎果實。多卧少起。氣逆嘔吐。蓋由經血既閉。水漬於藏。藏氣不宜。血脈不行。故有此候。察其候合其脈。孕之是非無所遁矣。若兼有表裏諸疾。脈不可辨。則別有驗之之法。以雀腦芎藭一兩當歸七錢爲末。分二服。煮艾湯或醇酒下之。二三時閒覺腹中臍閒微動。卽爲有孕。或以醋煮艾湯半盞服之。有孕必大痛。無孕則否。妊娠四月。男女可分。脈法左疾爲男。右疾爲女。左右俱疾爲產二子。左手沈實爲男。右手浮大爲女。左右俱沈實。生二

男左右俱浮大生二女左尺偏大爲男右尺偏大爲女左右尺俱大爲產二子又法左尺中浮大者男右尺中沈細者女若脈不可知則有辨法令人按其腹如覆盂者男也如附項參差起者女也左乳房有核者男也右乳房有核者女也孕婦行坐自後急呼之左迴首者男右迴首者女蓋左右者陰陽之道路也陽親其左陰親其右自然投託各就其所氣血因之故脈象應之盛於左則左疾而太盛於右則右疾而太其有異孕無所歸屬則兩者皆見尺中者腎部也腎主胞門孕之所在陽具於左故浮太陰具於右故沈細也男形常伏女形常仰故揣腹可知乳爲陰府下通胞門陰盛則結各就其位氣血偏盛則身有偏重視其迴首可知者必慎護其重

也。千金方又言男子左乳房結核者生男，右乳房結核者生女。婦有孕而驗其夫，原其所始，理亦可通。而所以結核之故，終不可解矣。



南京中医药大学图书馆版权所有

養孕第二

妊娠一月名始胚。足厥陰脈養之。其經內屬於肝。肝主筋。及血是時血行否澁。毋爲力事。必令安靜。嗜酸。鹹食宜。麥。母食腥辛。若曾孕一月而墮者。宜預服補胎湯以養之。

補胎湯 乾地黃 一兩 白朮 一兩 生薑 一兩 防風 六錢 大麥

二合 烏梅 三合 細辛 三錢 吳茱萸 一合 八味以水三升煮

一升分三服。熱而渴者去吳茱萸。細辛加桔蘖根 三錢。

見千金方

二月名始膏。足少陽脈養之。其經內屬於膽。主精。是時精成於胞。裏若曾孕二月而墮者。宜預服黃連湯以養之。

黃連湯 黃連 三錢 人參 三錢 吳茱萸 一合 五勺 生薑 一兩

生地黃 一兩六錢 共五味以水三升煮一升分四服日一

若覺不安加烏梅 三合 見千金方

三月名始胞未有定儀見物而化手心主脈養之其經內屬於心當靜謐以定心氣食穀宜稻羹宜魚若曾孕三月而墮者宜預服茯神湯以養之

茯神湯 茯神丹參龍骨各 三錢 阿膠當歸甘草人參各 一

兩 大棗 二十一枚 赤小豆 二十一枚 九味水三升煮一升

分四服七日後更作腰痛者加桑寄生 六錢 見千金方

四月始受水精以成血脈手少陽脈養之其經內輸於三焦是時形體已具當盛其血氣以通耳目而行經絡若曾孕四月而墮者宜預服菊花湯以養之

菊花湯菊花如雞子大一把麥門冬三合大棗十二枚人

參五錢當歸甘草各六錢阿膠一兩生薑一兩六錢八味

以水三升煮半內清酒一升并膠煎取一升分二服若受

寒者加麻黃見千金方

五月始受火精以成其氣足太陰脈養之其經內屬於脾是時四支皆成宜適飢飽其食宜甘羹宜牛羊和以菜茹養氣以定五藏若曾孕五月而墮者宜預服安中湯以養之

安中湯黃芩三錢當歸芍藥乾地黃人參各六錢甘草芍

藥各一兩生薑二兩麥門冬三合五味子一合五勺大棗

三十五枚十二味以水二升三合清酒一升五合煮取一

升分四服日三夜一七日後更作見千金方